



Broj: 05/1-50-14-51-14/11

Sarajevo, 20.4.2011.

ZAPISNIK

14. sjednice Nezavisnog odbora kao nezavisnog tijela policijske strukture BiH

Sjednica je održana 20.4.2011., s početkom u 12.30 sati.

Sjednici su prisustvovali članovi Nezavisnog odbora: Žiko Krunić, Bakir Dautbašić, Dragan Savić, Ljubomir Kuravica, Viktor Dadić, Stanko Nuić, Enes Obralića i Zijad Kadić.

Odsutan je bio Mato Jozić, zamjenik predsjednika Nezavisnog odbora.

Sjednici je prisustvovala Alma Salkić-Mijić, koja je obavljala poslove sekretara Nezavisnog odbora.

Sjednicu su pratili: Dijana Šatara i Senad Zlatar iz OHR-a, Tamer Kilic i Fatima Miletić iz EUPM-a, Aida Kovač iz FENA-e te Zoran Brkić iz Sektora za odnose s javnošću PSBiH.

Četrnaestu sjednicu sazvaio je Žiko Krunić, predsjednik Nezavisnog odbora. Nakon što je konstatirao da postoji kvorum za punovažan rad predsjednik je otvorio sjednicu. Nezavisni odbor jednoglasno je usvojio sljedeći

DNEVNI RED

1. Usvajanje Zapisnika 13. sjednice Nezavisnog odbora, održane 30.3.2011.;
2. Izjašnjavanje članova Nezavisnog odbora o inicijativi za izmjenu člana 59. Zakona o policijskim službenicima BiH;
3. Tekuća pitanja.

Ad.1. Usvajanje Zapisnika 13. sjednice Nezavisnog odbora, održane 30.3.2011.

Predsjednik Odbora otvorio je raspravu o Zapisniku 13. sjednice Nezavisnog odbora, održane 30.3.2011.

S obzirom da nije bilo primjedbi, Zapisnik 13. sjednice usvojen je jednoglasno.

Ad.2. Izjašnjavanje članova Nezavisnog odbora o inicijativi za izmjenu člana 59. Zakona o policijskim službenicima BiH

Predsjednik Nezavisnog odbora Žiko Krunić u uvodu o ovoj tački dnevnog reda istaknuo je da se Nezavisni odbor ovim pitanjem bavi duže vrijeme i da je na nekoliko sjednica vodio raspravu o tome. Dao je riječ Tameru Kilicu da iznese stav EUPM-a o ovoj inicijativi Nezavisnog odbora.

Tamer Kilic upoznao je članove Nezavisnog odbora sa stavovima EUPM-a o ovom pitanju. Naglasio je da je stav EUPM-a da se odredba člana 59. Zakona o policijskim službenicima

BiH ne treba mijenjati. Osnovni razlog za to je što u BiH postoji 14 zakona o policijskim službenicima i da su svi usaglašeni, njima je uspostavljen jedan sistem i način napredovanja u policijskoj strukturi. Ako bi se član 59. Zakona o policijskim službenicima BiH izmijenio, mogao bi da poremeti taj sistem. Obavijestio je članove Nezavisnog odbora da postoji jedna radna grupa koja radi na izmjeni Zakona o policijskim službenicima BiH i da su u nju uključeni i predstavnici policijskih agencija BiH, te predložio članovima Nezavisnog odbora da zatraže mišljenje radne grupe o ovom pitanju.

Predsjednik Žiko Krunić zahvalio se predstavniku EUPM-a na iznesenim stavovima, a zatim je dao riječ predstavnicima OHR-a da i oni iznesu svoj stav.

Dijana Šatara je u ime OHR-a obavijestila članove Nezavisnog odbora da OHR ne podržava izmjenu člana 59. Zakona o policijskim službenicima BiH. Navela je da je policijski sistem zatvoren sistem i da tako treba i da ostane, da su članom 59. na pravi način propisani uslovi za rukovodioce policijskih agencija i da oni s jedne strane omogućavaju napredovanje policijskim službenicima, a s druge strane sprečavaju uticaj politike na izbor direktora i zamjenika direktora policijskih agencija u BiH u mjeri u kojoj je to moguće.

Predsjednik Žiko Krunić zahvalio se i predstavnicima OHR-a na iznesenim stavovima.

Otvorio je raspravu o ovoj tački dnevnog reda.

Član Odbora Zijad Kadić naglasio je da smatra da član 59. Zakona o policijskim službenicima BiH treba mijenjati na način da se omogući većem broju ljudi da se kandidiraju na te pozicije. To je moguće na više načina. Jedan od njih je brisanje posebnog uslova posjedovanja čina glavnog inspektora i tri godine u tom činu, i na taj način omogućavanje i licima koja nemaju čina, a ispunjavaju druge posebne uslove da se kandidiraju. Drugi mogući način može biti da se posebni uslov posjedovanja čina glavnog inspektora i tri godine u tom činu zamijeni posebnim uslovom posjedovanja čina samostalnog inspektora koji je stekao uslove za glavnog inspektora.

Tamer Kilic, pravni savjetnik iz EUPM-a, u vezi s raspravom člana Odbora Zijada Kadića, konstatirao je da nije u skladu s policijskom hijerarhijom da se omogući preskakanje činova i da sa čina samostalnog neko dođe na mjesto generalnog inspektora.

Član odbora Stanko Nuić istaknuo je da su članovi Odbora u trenutku kada su otvorili raspravu o potrebi izmjene člana 59. imali racionalne razloge, 13 prijavljenih kandidata na šest pozicija. Naveo je da u početku nisu imali podatke o broju glavnih inspektora u BiH. Sada kada su ti podaci prikupljeni, koji pokazuju da u BiH ima puno više glavnih inspektora nego što ih se prijavilo na konkurs, smatra da ovaj član ne treba mijenjati jer niko ne zna razloge zašto se lica koja ispunjavaju uslove nisu javila na konkurs niti je to razlog za izmjenu zakona.

Član Odbora Enes Obralića zahvalio se predstavnicima OHR-a i EUPM-a na iznesenim stavovima u vezi s inicijativom Nezavisnog odbora za izmjenu člana 59. Zakona o policijskim službenicima BiH. Istaknuo je da ovo pitanje nije moguće posmatrati crno-bijelo, i da ima argumenata i za ovu inicijativu i protiv nje. Međutim, želio je da skrene pažnju na to da izmjenom člana 59., u smislu brisanja posebnog uslova posjedovanja čina glavnog inspektora u trajanju od tri godine, ne bi bilo zabranjeno policijskim službenicima da konkurišu, a s druge strane omogućilo bi se i licima koja ne posjeduju čin da se prijave na konkurs, što je mnogo demokratičnije rješenje od postojećeg.

Nakon završene rasprave o ovoj tački dnevnog reda, članovi Nezavisnog odbora odlučili su da se ne izjašnjavaju o inicijativi za izmjenu člana 59. Zakona o policijskim službenicima BiH na današnjoj sjednici.

Ad.3. Tekuća pitanja

Predsjednik Nezavisnog odbora otvorio je raspravu o ovoj tački dnevnog reda. Predložio je da se članovi Nezavisnog odbora sastanu s rukovodstvom Državne agencije za istrage i zaštite kako bi se detaljnije upoznali s radom ove agencije.

Nezavisni odbor jednoglasno je usvojio zaključak da se u maju organizira sastanak članova Nezavisnog odbora s direktorom i zamjenikom direktora Državne agencije za istrage i zaštitu u sjedištu Državne agencije za istrage i zaštitu, s ciljem sagledavanja njihovog rada.

Sjednica je završena u 14.30 sati.

Privremeni sekretar
Nezavisnog odbora
Alma Salkić-Mijić

Predsjednik
Nezavisnog odbora
Žiko Krunić